



# Assam Rifles-i Mangmetong nung asür nem akum agütsü



**Dimapur, Rongchii/April 14 (TYO):** Assam Rifles temi Rifleman/General Duty (asür) Nokzar Ao nem akum agüja par taso yim Mangmetong nung narojung yutsüba sentong ka

agia liasü. Asür Nokzar Ao-i Manipur nung Kamjong district kübok Leisin Kongkan tesem nung April 14, 2009 nü linük asoshi takum benanga agüja liasü.

Iba sentong nung Officers asem, JCOs 22 aser NOK densema ORs 70 aser Rifleman/General Duty (asür) Nokzar Ao kinungertem dena liasü.

# Congress lenir Priyanka Gandhi-i Assam & Tripura nung nübu ayimtsü

**Guwahati, Rongchii/April 14 (Agencies):** Linük nung Lok Sabha election tonga aruba mapang nübuyimba maparena tesashiba akumer aser Congress lenir Priyanka Gandhi-i election nübuyim asoshi Assam semdangtsü lir.

Lai Assam ya April 16 nü semdangtsü amai angazüker.

Lai iba mapang Assam kübok Jorhat Lok Sabha constituency nungi Congress candidate Gaurav Gogoi asoshi nübu yimtsütsü.

Iba nübuyim nung shilem ka am alai Titabor nung road show ka nung shilem agitsü aser iba sülen Tripura kübok Agartala-i oa yangjia nübu ayimtsü sentong lir.

Assam nung Jorhat Lok Sabha constituency atema election ya April 19 nü agitsü.

April 16 nü Priyanka Gandhi-i anir Agartala nung opposition INDIA bloc candidates bhukuma Tripura West aser Tripura East Lok Sabha constituency tem nung roadshow alitsü.

Tripura nung roadshow ya Agartala kübok tongtipang tesemtem nung agitsü aser Priyanka Gandhi-i Surya Chowmuhani anasa senden ka nung jembitsü.

Congress MLA Sudip Roy



Priyanka Gandhi

Barman-i iba roadshow nung ajaki shilem agitsü ayongzüker aser linük tarutsü tia yangertsü atema nüburtemi tongti shilem agitetsü, ta ashi.

West Tripura Lok Sabha constituency nung Tripura Congress tir Asish Kumar Saha ya opposition INDIA bloc tenüng tokteptsü aser taoba CPI-M MLA Rajendra Reang-i East Tripura Lok Sabha constituency nungi tokteptsü.

West Tripura Lok Sabha menden aser Ramnagar assembly constituency by-election election ya April 19 nü agitsü aser Tripura East parliamentary constituency atema polling ya April 26 nü lir.

# 2026 küm Assam nung AAP-i sorkar kumtetsü: Punjab CM



Punjab chief minister Bhagwant Mann

**Guwahati, Rongchii/April 14 (TYO):** 2026 küm Assam assembly elections nung Aam Aadmi Party (AAP)-i takok angutsü aser sorkar kumtetsü, ta Punjab chief minister Bhagwant Mann-i ashi.

"Kü o temulung nung yuang - Assam nung 2026 assembly elections nung AAP-i takok

angutsü aser sorkar anitsü." Sontipur nung AAP candidate Rishiraj Koundinya asoshi nübuyimba sentong ka nung jembidang, Punjab aser Assam indang sobaliba aser rongsenketing mesüktepa lir, ta Mann-i ashi.

Pai Assam nung süngolu nung inyakertem takum jenjang

ajungkettsütsü nangzüker aser parnok anogoshi taa sen 450 kumtsütsü aser teyari legislation yanglutsü ta ashi.

BJP-i aniba Assam sorkar inyakyim aitsüdang, taka-taiter kar atema masü saka nüburtem ajungkettsü asoshi rangloksü nüngdaker, ta pai ashi.

Mann-i Assam Chief Minister Himanta Biswa Sarma aija jembidang, nübur shisaliok senzüka yutsü aser pei asoshi bilemba ajanga terenlok malir, ta ashi.

"Pa (Assam CM) kinungtsü meyong private school ka lir, anungji pai government school tem tajungba kuma renloksütsü tejangraba mali," ta pai ashi.

Lok Sabha elections asoshi Assam nung AAP-i candidate ana shima lir.

## METONGSHITSÜR

Tir Yimyim adok 182, April 14, 2024 nü Tapak 2 nung "Mokokchung Police-i miim mozü shibelena ayoker aser achir 3 apu" ta adokba nung "Mongsenyimti nunger Imotiba" ta alibaji "Changtongya nunger Imotiba" ta tazüngertermi melenshia züngdaksüner. Aibelenba atema sasar ta Mokokchung Police osang ajanga metetdaksüogo.

# Rachü Union Kohima hon jubilee mungogo



**Kohima, Rongchii/April 14 (TYO):** Rachü Union Kohima (RUK) hon jubilee mung Naga Heritage Village, Kisama (Amphitheater) nung April 13, 2024 nü munga liasü, kong NPP MLA Tsielhoutuo (Ato) Rhütso aser taoba NDPP MLA Zale Neikha na chief patrons ama dena liasü.

Rachü ya Viswema village indang khel (sector) ka lir aser RUK yagi iba khel nungi Kohima nung alirtem ajangzüksü asoshi inyaker.

Iba sentong nung jembidang, jubilee ya benjongmung kisüng masü saka tang tensa den abet tarutsü asoshi lenmang bushiba mapang ka lir, ta Dr Ato-i ashi.

Pai nüburtem dang ajak nung temeim tiyong südaksütsü

ayongzüker aser kati ka asoshi temeim lira tamajung inyaktsü mulungsentsü malitsü, ta ashi.

Kohima nung tesendaktep aser association indang jembidang, Kohima village nung Tsütuonuomia aser Dapfhütsumia Khel ya nüburtem akumdong kisüng masü saka union asoshi adianu aser kibong ka amai züngshir, ta Dr Rhütso-i ashi.

"Nisung ka dak temulungjang nung temeim lira, pai dangar den lemsateptsü, jungteptsü aser lokti asoshi mapang tajung inyaktsü mulunga alir, anungji pei sasa pei meimtsüla aser dangara meimtsüla," ta pai ashi.

Dr Ato-isa oral history kanga junga bendena ayutsü nüngdaker ta ashi aser maneni tesendaktep

alitsü ayongzüker. Elected representative ka ama Dr Ato-i nüburtem dang nungi teyaritep aser amalitep alitsü ayongzüker aser paia nüburtem den pai akokba nung yariteptsü ashi.

Taoba MLA Neikha-ia züngsemtem dang nüburtem asoshi mapa tajung inyaktsü temulungtetba nung tejakleni aotsü ayongzüker.

Jubilee ya nüburtem asoshi asendenshiba mapang, tatok agütsüba aser tanaben jungshitepba mapang lir, ta pai ashi.

Tejakleni aotsü asoshi kin kidong züngsemtem alidak kati ka den telungjem nung alitsüla, tashi maiter ajungkettsüla aser nüburtem asoshi tajungtiba

inyaktsüla, ta Neikha-i ashi.

Tanü tensa nung lanurtem employment mangu timtemer, aser academic tsütsü literacy rate junga liaka takumiyima ajak nung kanga toktepa kumogo, ta pai ashi.

Züngsem aika competitive exam aser danga wadang nung takok nguaka civil service examination amala tatidang majangteter, ta Neikha-i sasaba ashi.

Ibai talisa asenok dak temulungtetba aser meranga inyakba yimyattem maliba ajanga lir, ta pai ashi.

Keviswedel Kin-i RUK tenzüka otsü ashi aser yimdaklirtem business, education aser employment atema Kohima-i aru ta ashi.

Kasa tanangatetba alirtem telungjem aser tesendaktep nung alitsü ajiteta RUK ya kumtet, ta pai ashi.

D Khel Kohima village chairman Pele Khezhe aser T Khel Kohima village chairman K Neibou Sekhose nati salem o lemsatop aser Mission Director, ABCC Rev Atha Neikha-i sentong tenzüka sarasadem.

RUK tir Dzüvihol Kweho-i tarur pela agizükba o jemi aser convenor organizing committee Keyiekhru Rhütso-i melepzüng o jembia liasü.

Rachü khel nungi tetsür temi iba sentong nung sobaliba ken ka aten aser Associate Pastor, Viswema Baptist Church, Vireto Theyo-i sentong tembanga sarasadem.

# PM Modi-i Lok Sabha election atema BJP manifesto sayaogo



April 14, 2024 nü New Delhi nung Ato kilonser Narendra Modi den Union Home Minister Amit Shah, Defence Minister Rajnath Singh aser BJP Tir, J P Nadda nungeri taruba Lok Sabha election atema BJP manifesto sayatsüdang tangokba noksa nung angur.

**New Delhi, Rongchii/April 14 (Agencies):** Amongnü New Delhi nung aliba BJP headquarters nung Bharatiya Janata Party (BJP)-i Lok Sabha elections 2024 atema party manifesto sayaogo.

'Sankalp Patra' ta ajaba manifesto ji 'Modi Ki Guarantee' nung amendaka lir.

BJP-i, iba manifesto nung Ato kilonser Narendra Modi-i linük nüburttem dang nangzüka alibattem densema lir, ta metetdaksü.

New Delhi nung osangbenertem senden ka nung Ato kilonser Narendra Modi den Union Home Minister Amit Shah, Defence Minister Rajnath Singh aser BJP Tir, J P Nadda nungeri party manifesto ji sayaogo.

BJP-i maneni linük nung Universal Civil Code (UCC) benoktsü aser 'One Nation One Election' mapa küma inyaktsü nangzüka lir.

Ato kilonser Modi densema party lenirtemisa taoba mapang BJP manifesto nung nangzükatem- Arria 370 agienba, Ayodhya nung Ram tekülem ki asütsü nangzüka aser Triple Talaq agientsü nangzüka atangji ataloktsüogo, ta metetdaksü.

BJP Tir, JP Nadda-i, BJP-i nangzüka ajak ataloktsü atema BJP-i election nung takok tulu nungdaker, ta aiben jembia arudar. Kasa tangatetba nungji BJP-i taruba election nung menden 400 dak tema angutsü yimiyim ayima inyaker.

BJP manifesto ji group 24 lemsaa lir, aser iba sasep nung tenangzükatem metetdakja lir; item group rongnung

sensakertem, tetsürttem, lanurtem, MSMEs, aluyimertem aser aayngertem densema lir. Ano group 14 rongnung 'Vishwa Bandhu', India security, terenlok India, shisaliok tajung aser senmang terenlok densema lir.

Manifesto sayaba sülen taoba mapang tenangzüka balala ataloktsüba indang video aika saya.

Rajnath Singh-i talisa manifesto committee nung züngsem ana union ministers-Nirmala Sitharaman aser Ashwini Vaishnaw na dang pelaba lemsatop.

Manifesto sayaba sentong nungji jembidang Modi-i, manifesto nung aliba tenangzüka balala rasaa metetdaksü.

Modi-i, party manifesto ya tongshi 4 terenlok nung amendaker yanglu, aser tongshi pezüji - Lanurtem, Tetsürttem, Sensakertem aser Aluyimertem lir, ta metetdaksü.

Iba manifesto nükjiongji taküm tajung aser akhümket nung rangloker renem, ta pai ashi.

Manisto nung 'Ayushman Bharat' scheme ajanga arrshi küm 70 ser temapurtem ajak ayimjemtsü, PM Awas Yojana kübok ano ki crore 3 tali sütsütsü, Mudra Yojana sen lakh 10 tashi agüja aliba nungi sen lakh 20 kümtsütsü, NAMO Didi yojana kübok yimtsüngtem nung aliba tetsürttem nem drone pilots training agütsütsü aser nisung core aika nem angati electricity agütsütsü nangzüka lir.

Lok Sabha elections shilem tenet lemsar April 19, April 25, May 7, May 20, May 25 aser

June 1 anogotem nung agitsü aser June 4 nü election agiba osang sangdongtsü.

Ato kilonser Modi-isa, Birsra Munda sor küm 150 ajungba nungtem nung 2025 küm Janjatiya Gaurav Varsh amongtsü aser tribal nisungtem tajangzük ngudaktsütsü atema mapatong aika benoka inyaktsü, ta metetdaksü.

Paisa, BJP-i Parliament nung Women's reservation tenangzüka ataloktsüogo, aser maneni One Nation, One Election aser Uniform Civil Code atema inyaktsü, ta metetdaksü.

Manifesto nungsa taruba küm 5 ano maneni angati ration scheme agütsüba scheme alitsü aser sensakertem nem chiyungtsü tajung agütsütsü nangzüka lir.

Jan Aushadhi centres nung maneni jenjang shilem 80 ajemer mozü agütsütsü, Ayushman Bharat scheme kübok nüburttem nem maneni sen lakh 5 jenjang tashi angati healthcare treatment agütsütsü aser iba scheme ajanga arrshi küm 70 ser temapur teintet sensotema ayimjemtsü, PM Awas Yojana kübok sensakertem atema ano ki crore 3 sütsütsü aser Ujjawala Yojana kübok aika nem gas cylinder angati agütsütsü manifesto nung nangzüka lir.

BJP-isa 'Mudra' scheme kübok loan sen lakh 10 tashi agüja aliba nungi sen lakh 20 kümtsütsü nangzük. Yimtsüng aser jila naprongla nung enterprises tenzüktsü atema lanurtem nem maangka agütsütsü asoshi loan sen lakh 20 tashi tutsür.

# BJP manifesto ajanga mapa manguba tebilemstsü sendoker: Tejashwi

**Patna, April 14 (Agencies):** Amongnü BJP-i Lok Sabha election atema party manifesto sayaba sülen RJD lenir aser taoba mapang Bihar deputy chief minister, Tejashwi Yadav-i, BJP Lok Sabha manifesto ajanga mapa manguba tebilemstsü, aluyimertem tebilemstsü onüktem aser jenjang atuba tebilemstsü sendoker, ta aitsü.

Patna nung osangbenertem den jembidang pai, "BJP manifesto nung mapa agütsütsü atema kecha shia mali. Jenjang ajemtsütsü, mapa manguba tebilemstsü aser sensak tia indang shia

mali. Linük nung nütsting lanur shilem 60, aluyimer shilem 80 aser yimtsüngtem atema manifesto nung kecha shia mali," ta metetdaksü.

"Parnoki (BJP) manifesto nung mapa manguba tebilemstsü, aluyimertem tebilemstsü aser jenjang atuba tebilemstsü atema kecha shia mali. Iba tetezü nüburttem nem agütsütsüsa BJP dak kecha mali," ta paisa metetdaksü.

Tejashwi-i, "Iba party yagi backward aser sensaker state tem atema mebilemer. Bihar ama state tem ajungkettsütsü aser terenlok mapa inyaktsütsü atema kecha shia mali," ta paisa shisem.



April 14, 2024 nü Mandi nung BJP candidate, Kangana Ranaut aser taoba mapang Chief Minister Jai Ram Thakur nati Lok Sabha election atema nüboyimdang tangokba noksa nung angur.

# Canada nung India nunger kaketshir ka khaset

**New Delhi, April 14 (Agencies):** Canada nung India nunger kaketshir ka pa indang gari telung nung lia nisung kari khaset; arrshi küm 24, Chirag Antil ji South Vancouver nung pa meyong Audi gari nung kari khaseter lia angu, ta police-i metetdaksü.

Vancouver Police Department-i sangdong ka ajanga, East 55th Avenue aser Main Street nung alirtemi injang ola angashiba sülen parnoki police nem iba osangji metetdaksü, ta ashi.

Iba tesem atongba sülen police-i Chirag Antil tasü mangji gari telung nung angu; tang

tashi nungbo shinga mapu aser maneni bushisüngdangdar, ta police-i metetdaksü.

Osang angazükba agi, Chirag'er adianu Ronit-i, anepdang pai Chirag den jembidang pa kanga pelaa liasü, iba sülen pa Audi gari nung tesem kati ao, ta metetdaksü.

Antil'er kibongi pa tasü mang India-i bener arutsü atema crowdfunding platform GoFundMe tenzükogo.

2022 küm September ita nung Chirag Antil, Vancouver-i ao aser University Canada West nung MBA renemba sülen tawa work permit ngur liasü.

# Israel nung Indian Embassy-i sensotem nem tekümdangtsü metetdaksü

**New Delhi, April 14 (Agencies):** Tang Middle East nung tensa tamajungba akümba mapang nung Israel nung aliba Indian embassy-i India nunger sensotem dang kanga küm danga alitsü aser yangji aliba ketdangsertemi tuyuba tashi angaa alitsü metetdaksüogo.

Amongnü anepdang züngia Iran-i drones aser missiles 300 dak tema amshia Israel amakba sülen Indaian Embassy-i yangji aliba sensotem nem tekümdangtsü metetdaksür.

Indian embassy-i, parnoki iba tensa ya mita dang

reprangdar aser yangji aliba India nunger sensotem kümzüka alitsü atema India aser Israel naprongla nung ketdangsertem den tongtepratepa inyakdar, ta metetdaksü.

Indian embassy-isa emergency helpline ka lemsatop aser sensotem dang register süa malirtemi tekeraba nung embassy nung register süang, ta metetdaksüogo.

Registration form nungji passport number, tenung, email address, mobile number, mapa inyakba osang aser talidak address lemsatepsüla.



April 14, 2024 nü New Delhi nung linük temzüng yanglusang, Dr. BR Ambedkar asoba anogomong nung Chief Justice of India, DY Chandrachud-i asür nem akhüm agütsüdang tangokba noksa nung angur.



## TIR YIMYIM YIMOBILEM (EDITORIAL)

DIMAPUR TENTONÜ, APRIL (RONGCHII) 15, 2024

### Pei vote-bosa agütsütsüla

Joko election nung vote enoktsütsü atema anogo pezünü dang anünga lir, anungji nisung teimbaka kechi telok mesüra shiba nem vote agütsütsüar temulung nungbo telemtetba agir alitsüa akok. Atangji, election nung vote enoktsüyonga anibelega vote agütsü malang tadokertemi vote enoktsürtem pei taküm aser pei lima agi nümadanga alitsüsa meinyaker. Iba jagi nübortemi pei shimtetba yimsüsürtem anema kanga jembir. Ibaji peisasa pei meyong metepshir amai lir. Ibaji kadang bilemdangdir, election nung adokertemi nübortem mulungsüa meinyaktetbaji tim danga ta asütsüsa nübortemi election mapang inyaker. Aji oda, nübortemi election nung pei vote sen aser mapayong mayok ser pei angatetba nung ochishia pei vote peisasa enoktsü asübo, tadokertemi pei asoshi meilemi nübortem asoshi dang bilema inyakra. Ano, asenok nübortem dak tezüdangtsükaji asenok aikati asen nem yimsüsür shimtsü temeten agütsüba maongka ya kecha hau ta mali, anungji vote agütsüi moar, anungji asenok meyong vote to tangari enoktsür. Asenoki metettsüba kaji, tanü putu nung yimsüsürtem shimtsü atema nübortem nem vote agütsütsü temeten agütsüba ya angati anguba temeten ka masü, ibai tangarbo taküm tenlaa rarar külenang anguba temeten lir. Iba amajika masü asübo, tanüa kibong ka nungi dang melentepa chuba kümer nübortem madak pei sünütsü süa yimsüsüa lila. Ibaji kadang asenoki angatetdir, atangji, asenok nem vote agütsütsü temeten agütsüba ya sentia ta angatettsü. Aji oda, asenoki election nung vote agütsüba yagi nisung ka yimsüsür asütsü shimtetba dang masü saka asenoki agiba tzü mopong dena tajungba mesüra majungba kümdaytsü telemtetba agir ta asenoki bilema vote agütsüi aotsübaji kanga tongtibang lir. Atangji, vote agütsüi aotsübaji temela masü, kechiyong yimer den anogo piyong tarensena nokdaker külenang agütsütettsüa akok. Ajsüaaka, alima nung tajung kecha angati agibo mangutsü, anungji alima yimten aser loktiliba tajung sünüra aser rongsen jenjang tajungba kümnüra vote enoktsütsü atema election agiba anogo nung mapang tatsükabo nokdak aremetsüla. Ashiko, asenokbo yamaji aruji, tang yongi nisung karbo tangar melen vote enoktsütsü asoshi ayangdak bushia senzua alitsüa akok. Tanü Nagaland majungbaji proxy enoktsürtem jagi raksar ta bilemdi. Joko, asenok dak asen vote ayoktsü mesüra tangar vote enoktsütsü shisatsü malitsüla, saka pei vote peisasa enoka asen nüksung yimsüsür shimtsü tangatetba aser temulungtetba alitsüla. Asenok tain aser tamangba yimsü nunga Khristan, anungji election mapang nung teindang shisatsü agi ochishia shilem agi tenzütsüla. Tangar Hindu aser Muslim nungerbo pei vote peisasa enoker saka asenokbo vote agütsüia maor aser tagütsürtemi marurtem meyong vote dena agütsür ta süra asenokbo election magidangyongi tamakoker kümogo ta bilemdi. Taküm nung takok ya election nung pei telok aser pei candidate-i anguba takok dang nungi kanga agia tulubaji ochimashi inyakyim madak ochi aser teindang mapatem agi takok anguba takok asütsü. Iba takokji tang asen lima nung nungdaker. Nagaland asoshiibo shirnoki vote kwi agi akok ta asübaji tongtibang masü saka election nung nübortemi ochishia shilem agir magitet ta asübaji tang tongtibang asütsü. Katibosa akoktsüji election shia nung asenok vote agi takok angur, saka asenoki anguba takok agi temoatsü lenmang mepipoktet kangshir. Iba timtemji asenoki asen nem agütsüba temeten memeteti kari ayoker aser kari mamshir ta asüba ajanga ataloker. Atangji, election nung tokteper ajakji ka mashi kasa majung aser kasa metemsü süra koba shimtsü ? Ibaji nübortem asoshi tetsükdak tuluka asütsü. Iba amaji mataloktsüsa asen senti vote-ji asen angatetba ka nem ochishia agütsü tenzütsüla, idangji dang koba shimer koba meshim nisung teindang aser tetemsü election nung tokteptsü aser alima tajungba küma melenshitsü.

## OLEMSABANG NAGA KIN LIA ARUBA

~ M.Meren Ex.Pastor Ungma

(Yashi adok nungi...)

### HOMOSEXUAL

Alima aika nung tebur o tebur na aser tetsür o tetsür na metemba indang sashia jembir saka iba mapa ya tetenzük nungi alima nung benschia aru saka Tsüngremi meimchir yanglubaji tebur o tetsür na alitsü asoshi tabensa yanglu aser iba jagi alima süngdaytsütsü nükjidong liasü, anungji tetenzük nungi Yihuba Tsüngremi iba mapaji sembar. Levi 18:22 nung zülua alibaji asenoki züngdi "Tebur shingaia tebur den memetemtsüla, ibaji Tsüngremi sempar" ano asenoki 1Kor 6:9 tatemlenji züngdi "Teburi tebur den japu jarirtem süshia parnokji Tsüngrem yimli nung senmang mangutsü" aji Tsüngrem o tejangja masü no? Ano asenoki Levi 20: 13. Ji züngdi "Tebur kari tetsür den ama tebur den metemra tenaprongla tesembatsü "anungji tenaprongla tepseta endoktsüla ta ashir" Ano Rom 1:26-32. Nunga tetsürtemi tebur den kazüba toktsür tetsür den yimya masüba benschia aser kasaji teburtemia tetsür den kazüba toktsür yimya masüba kasa tebur den medem, parnok ajakji tesembatsü aser tasütsü tetemsü ta shia angur. Yamaji Tsüngrem o aika ano asenoki angutsü, anungji iba tesembatsü mapa ya tetenzük nungi alima nung liasü aser ajakji Kibuba tsüngdang tesembatsü lir, anungji parnok asoshi shisabulutsü kecha mali saka tatem nung Tsüngremi parnok o bendangtsü, anungji ibalapurtemji Arogo nung züngsem asütsü masütsü ta ashishitsü menüngdaker kechiaser parnok mapa agi parnok o bendangadokogo. Anungji Arogo aser Mungdangi ibalapurtem asoshiibo ola tulu adoktsü nungdaker.

### NAGA NUNGERI AJANGA ARUBA

India Governmenti Naga nunger azüoktsü asoshi mezüngbuba Assam Policetem amshi, anungji Assam Policetemi Naga nunger yimtsüng shia nung ki timba rongdoktsübaji Assam police-i rongtoktsü, aser yimdaklir timba zükseta azükabaji Assam police ajanga inyaker, aser Assam policetemi prangpong amer yimdaklir kaa senzübaji parnok tenzü, arem nung lia pei linük asoshi jajartembo par ki ajak Assam Police-I bona yongrak kata meyutsüi bener ao, parnok sülen India Army aru aser rasa meshitetba rishikangshi agi Naga lima nüburtem kangshi. Naga nunger asangur tajung pei lima asoshi aremi senoka aitem ishika tang taküm meyipa shilang. Tanü Mayamar lima tenem nisungtem Mayamar Sorkari tayimtsü amshia Bomb tulu amshia tesüngmangtsü amakba ajanga tenem nisungtem merijangjenti tepset aser alima tangaleni mezüngdangtet jena ao, aser ano tang telidak yimdaklirtem kasaji rishikangshi tulu nung lir, iba medemji taoba mapang Naga lima nung India nungertemi kangshibaji tebang agi rasabo meshimatsü südi, Naga lima putu mapang ka nungbo asangur kata mali ajurua aru, kechiyong timba arem nung teret endok, Naga lima aiür aika tetemsü asangur majuru amitsür akum, kidong kibong tashika mapang tongtibangsa yim timba ka nung Mejsangar putu liasü, par putu nung tashi ajak agi pei linük meim aser tasü tonga arem, anungji kibong tajung tang chirnur mesü teyalong nung tebuji linük asoshi jalli küm kaka küm ana na alena bener ao. Taküm tajung meshilang, teret tekong züksar ara tur kokteter dang shilang, jail nungi shilanger kopi melie leperi ao. Iba putu nungji yimtsüng nung nisung agi kanga anünga aküm, kechiaser kinungbor küm ana asem jail nung dang ali aser jail-I maortem kidang kinungtsür den kodanga anisüngzüka mayip, anungji alima nung tanur agi anünga akümba ajurua aru.

Naga nunger yim marongba ana-asekka dang alitsü südi, karbo asemben pezüben rongtoktsü, tsük jen ajak rongtoktsü, karbo apuni na kimai maludaktsü kidang külemi kaseta yutsür kidang ki arondang apuninaprongla par kidangji temang rongtokdaktsü, yim karbo yimer ajak anitener telok rongnungi tanubor pungu terok aniteter kinungtsür dang tatembang o kaka shidaktsür ajaki ngua idakji kaseta yutsüba ajurua aru, yim kar nungbo alu nung inyaka alir nisung 8 tashi pua teka alenteper miner atoka lemjem ka nung tanubosang anaji lenjang nung mena yutsür parnok terokji tanubosang ana jagi ngua terem terem ta kaseta yutsür Armytemji Mokochungji tuadok. Yim kar nungbo aiür tajung ana teyi o tenu na yimdaki tsük abeni atokdang yim tezü len India Army ajurua tena dakji kenyongi tapayu meli dang injang kaloktsü, tenaprongla kator asaten ajepa yariang yariang ta ali ajak anaka sa jutena ajepyonga Shinga teyarir modaktsü nokdang aser yamaji arüa jeba amozüka aoba yamaji ajurua arugo, ni ibajibo kodanga amatsü makoker. Taoba putu nung tsüraburtem pei taso lima asoshi pei taküm tenlartem mezüngdangmatsüsa tepsetdaktsüogo.

Samaria Chuba Benhadad mapang nung Siria nungeri arua Samaria longbang aser yimtimi mapang talangka longbanger alinung yimti nung yawara tulu adok, anungji iba mapangji Gado tekolak kecha tachitsü maket teret dang süaka taribisen shekel tir yongsa ayok aser ajia kar dang atar. Ano guduru-I kozütenba Scü marok ka meteta tokzüker aji pezü küma lemsar shilem ka nung taribi sen shekel pungu yongsa ayok aser ajia mangur, tetezü guduru scü metena ajemtsüa mangu. Iba ama Samaria nung aya wara tulu aru anungji chitentsür anati tena chir kenü ka aser kenü ka ta soa achitsü pangjema lemtet aser yamaji tepseta achiba ajurua aruba aya wara tulu ajurba angur, 2 Chuba 6:24-31.

Tanü lanu asensortem aikati majuru saka India Armytemi Naga nunger ajunga yim pungu-terok yim ka nung grouping sentepdaktsü aser atsü tabu asem agi yimji meketbanga longpanger yimti ajak asoshi lenmang (Gate) ka dang lapoker Groupingji sentepdaktsü, iba mapang nungji yawara tulu Samaria yimti okrongba amaji asen Naga nunger yimdaklirtemi yawara tuluji ajuru. Asen Naga nungertemi ajuruba meshimatsüsa ajuruba tanü lanu putui memetet, aser tanü Nüchi tia bushir ta telok metsür pezü lir ta jembir, jungerto ajak jagi pei tetsü taso lima asoshi nokdaker süra India den koda jembitsüar anogoshia jembidar ma?

Anungji Naga nungertem yamai repringtepa melili saka Dimapur kisung nung telok telok senteper Naga lima artsü atena mao ser repringtepa agi mekümettsü anungji Naga lima nübur ajunga atenshiang, jatenang aser Naga nunger koloni aotsü lemtepa, Naga lima nung mi tulu jangrubu tensa nung NBCC Wokha nung senteper India nunger den yimjung lapoktsü lemtep, atalok aser tang tashi yimjung nung alir anungji tang Arogotem aser Mungdangtem amoi aotsü mapang masü, anungji sakang aser Naga lima koloni aotsü lemtepa ta ayongzüker.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Iran-i Israel amakba sülen Pastor temi Israel atema sarasademtsür



April 14, 2024 anepdang züngia Iran-i missiles amshia Israel amakdang Israel nunger Iron Dome air defense system amshia missiles nokdangba noksa nung angur.

**April 14, 2024:** Amongnü anepdang züngia Iran linüki drones aser missile aika amshia Israel amakba sülen alima nung Khristan lenirtemi Israel nung yimjung aser security atema sarasademjang, ta tayongzükba agütsür.

Security ketdangsertemi ashiba agi, Iran nungi drones, ballistic missiles aser cruise missiles 300 shi amshia Israel amak, aser ibaji ajanga region nung rara tuluba adoktsüa akok.

Iran-i drones aser missile aika amshia amakyonga Israel nunger indang advanced defense systems ajanga itemji teimbaka nokdangteta liasü.

Iran yimtiba, Tehran nung Iranian Revolutionary Guards-ia Israel amakba osangji jangjatsüogo. April 1 nü Israel-i Syria nung Iran consulate amakba mangyanga Iran-i Israel amaker, ta parnoki metetdaksü. April 1 nü anünglen nungi consulate amakba mapang nungji Iranian Revolutionary Guards general ana densema sepai tenet asü.

Iran-i Israel amakba sülen alima tesem balala nungi Khristan lenirtemi Israel nung yimjung atema sarasademtsü ayongzük.

California nung aliba Harvest Fellowship nung pastor, Greg Laurie-i Israel amakba ya Laishiba nung shia aliba temaitsütem rongnung ka lir, ta metetdaksü.

Pastor Laurie-i X ajanga, "Evangelical America nunger ama Yihuda nunger medemertem den asenok nokdaka lir ta parnok nem metetdaksüner. Asenoki Yihuda nunger aser lar nüburttem (Israel) pusemer. October 7 nü Hamas-i Israel amakba sülen tang iba ya Iran-i Israel anema apusoba lir," ta metetdaksü.

Paisa, "Ajak takoksang Tsüngremi tang ama mapang

ka nung Israel kümzüksü atema sarasademtsür aser Yirusalem nung yimjung atema asenoki sarasademtsüsüla (Tenüngsang Ken 122.6). Alima tatembangleni aruba temaitsütem rongnung kaji Yihuda nunger sempaba kanga bulua akümba aser Israel sendokba lir. Tang asenoki item tatalokbatem ya asen tenük agi angur," ta metetdaksü.

Laishiba nung shia aliba shin otem nung mongin, pastor Jack Hibbs-ia "Iba ya Gog asalentong asütsüa akok... ibaji Russia asütsü. ... Aser Russia-i shilem agira asenoki Ezekiel tapu 38 nung shia aliba atalokba angutsü. Shisashirtem aikati Ezekiel tongbang matongdang Khrista tanaben arutsü ta bilemer," ta ashi.

Jack Hibbs ya Calvary Chapel Chino Hills nung pastor inyaker. Paisa X ajanga Khristanatem dang Israel atema sarasademjang, ta ayongzük.

Congress of Christian Leaders Tir, Rev. Johnnie Moore-i X ajanga, alima tesem ajaklen Khristantemi Israel nung yimjung aser security atema sarasademtsüsü; nisung million aikati sarasademtsüsü, ta metetdaksü.

Iran-i Israel amakba sülen United Nations den linük aikati Iran aitsüogo.

France, UK aser Germany linüktemia Iran-i Israel amakba ajanga Middle East nung rara tuluba akümtsü, ta tebilemtsü akaba lemsatep.

Israel nunger Rear Adm. Daniel Hagari-i, Israel nunger advanced defense systems ajanga Israel arrtsülen drones aser missiles teimbaka nokdangtetogo, ta metetdaksü.

Osang angazükba agi Israel aser US sepaitemi Iran-i yokba drones aser missiles shilem 90 dak temabo

nokdangteta liasü.

Osangbener den jembidang Hagari-i, "Iran-i sashia amakba ajanga rara tulu adoktsü," ta ashi.

Tawa Israel-i Syria nung Iran consulate amakba sülen Iran-i mangyangtsü, ta bilema US Tir Joe Biden-i raraba tayimtsü aser missile defense systems aika bener aotsü tuyua liasü. US-isa Israel maneni pusemtsü, ta Biden-i metetdaksü.

Biden-i, "Item tayimtsü aser systems bener aoba ajanga ozü sepaitemi Israel yarisema drones aser missiles ajak amai nokdangtetogo," ta metetdaksü.

U.S. Defense Secretary, Lloyd Austin-ia America nunger sepaitemi Israel tsütsüleni aruba missiles aser UAVs aika nokdangtetdago, ta metetdaksü.

Missiles aser drones ji Iran nungi dang masü saka Iraq, Syria aser Yemen tesem balala nungia yoka liasü, ta Austin-isa metetdaksü.

Iran nungi yokba missiles karbo menokdangtetba ajanga southern Israel nung air base ka raksatsü aser arrshi küm tenet tetsür chanu ka yiru.

Israel-i Gaza nung Hamas telok amak tenzükba sülen nungi Iran-i Muslim linüktem longjemer Israel amaktsü atema ajungmesor.

Iran Tir, Ebrahim Raisi-ia, Israel aser parnok pusemba linüktemi mangyanga Iran-i ano tamajungba amaktsü, ta amokmerenogo.

Iran nung sepai tongti, Major-General Mohammad Bagheri-ia, "Iran-i Israel amakba ajanga onok nükjidong ajak atalokogo. Iba operation tembangogo aser maneni operation agitsü tebilemba mali, ajisüaka Israel-i Iran maakra Iran-i ano tesashiba amaktsü," ta metetdaksü.

## ANOGO ABEN TSÜNGREM DEN

## Talila jungkai adokba menüngdak

"Pa aser Pa shia aruba ain metettsü, aser Pa tasüba den putepa, Pa timtem toudhi aremzükba nung temedemba metettsü ni yongyar".

Filipi 3: 11.

Asenoki shitakba Pa metetner asü? Iba tasüngdangba yagi asen mapa, shisatsü, aser temulungtetba ajak Khrista jakla nung renloktsü bilemtetdaksür.

Ibai atalokdaksütsü asen teka nung lir. Asenoki bilemer Kibuba nem dang bendanga agütsüra Pai inyaksü. Philip dang Pai ashiba nungi ibai jangjatsür, "Na kü den papikati lia arur nai Ni memetet, Philip?" Küm asem Kibuba Yisu den jaja, sayu, tenzük, aser Pa taküm agi Tebu Jungkai Adokdakja ali, saka nütsüngtemi tanela asüngdang. Asenokia Kibuba dang jungkai adok tanela asüngdang. Saka Pai ashir, Ni asüba aser shia aruba nung Ni nenok dang ajak jungkai adoktsüogo. Ni metettsübaji dang nenok mapa lir, ni tanela jungkai adoktsüsüba masü.

Tamanger aikati iba taküm nung tashi tali aginer-: tenzüksü takok asoshi, aser taküm alitsü asoshi. Saka Kibubai ashir, Pa shia aruba ajanga Pa tashi ajak sayuogo aser nenok nem agutsüogo. Shia aruba Khrista shiba asenok dak alir iba dang tuluba teyari masü.

Talila jungkai adokba asüngdangtsü mali. Tanela Temeshi Pa metettsü asoshi asen shisatsü aser temulungtetba Pa nem bendanga agutsütsü ataa alir.

## West Bank nung apuba Khristan ka atema sarasademtsü mepishir



Layan Nasir

**April 14, 2024:** Küm asem tejaklen Israel sepaitemi West Bank nung Khristan tetsür ka pua liasü aser maneni Amongnüa la puogo.

Birzeit nung aliba St. Peter's Anglican Church nung züngsem arrshi küm 23, Layan Nasir Amongnü anepdang züngia lar kidang nungi puer aoba sülen Anglican Khristan lenirtemi la atema sarasademjang ta ayongzük.

Church of England nung tongti putir, Justin Welby-i social media ajanga Nasir apuba atema tebilemtsü katsüba lemsatepba den külemi Khristanatem dang la tekeraba nung chioktsü atema sarasademjang, ta ayongzük.

Welby-i X ajanga, "Iba osang angashia ni kanga aoksar aser tebilemtsü katsür. Palestine nunger Khristan adianutem den külemi ni-a Layan aser lar kibong atema sarasademtsür. Iba denji külemi Occupied West Bank nung St Peter's Anglican Church atema sarasademtsür. Yimlibilema Layan taküm

kümzüksü aser tekeraba nung chioktsü atema sarasademjang," ta lemsatep.

Yirusalem nung aliba St. George's College nung dean, Richard Sewell-ia social media ajanga, "Israel nunger sepaitemi West Bank kübok Birzeit nung aliba ozü Arogo nung züngsem ka apuba osang angashia aoksar," ta metetdaksü.

Amongnü anepdang 4:00 ako meta Israel nunger sepaitemi Nasir puer ao, aser tang la Israel nung aliba Damon jail nung puoka lir ta osang angashiogo.

Change.org petition ajanga ashiba agi, Nasir tawa ang Birzeit University nungi graduate süa liasü aser tang Ramallah anasa Palestine nunger NGO ka nung inyaker.

2021 küm nunga la den kaketsür 20 shi Israel sepaitemi pua ita aika tepuokdak yua liasü. Israel-i Progressive Democratic Student Pole ya ozüng alema tentetba telok ka ta züngshir, aser iba telok nungji laa züngsem ka lir.

# Israel amaktsü nükjidong ajak atalokogo: Iran army



Iran yimtiba Tehran nung British Embassy jakdang Iran nungertem adenshia Israel anema yimyim ayimba noksa nung angur. Iran mitkari Honibarnü Israel dak drone aser missiles temi amshia amak.

**Tehran, Rongchii/April 14 (Agencies):** Israel-i Syria yimtiba Damascus nung Iran indang consulate maker anogo ishika lir Israel amakba nung par nükjidong ajak nung takok nguogo, ta Iran indang paramilitary Revolutionary Guard tekolakbai Deobarnü ashi.

Syria nung aliba Iranian consular building nung hopta ana tejakdang amakba ya Israel dak temulung melemer, kong Iran nung sepai tanishir ana tepset aser iba tayang kepzüka Iran-i Honibarnü amakba ya küm aika linük ana tsükchitepa aruaka Israel dak Iran mitkar temi indang-indanga amakba tang mezüing alitsü.

State TV den sensaksema mapang, onok tang tashi osangtsüsang bendenba mapang lir saka amakba indang shilem kar indang osang tejangja bendenba aser iba atalokdak nungi documents bendenba nungi iba operation takok nguogo ta sayur, ta Gen. Hossein Salami-i ashi.

Zionist tsükchir temi mapa tamajung inyakba den peta Iran sepaitemi limited operation agia liasü ta pai ashi.

Israel air defence system ya tepenja, layer aika lir aser kangadang advance aser iba system ajanga aotsü kanga tasak liasü, ta Salami-i ashi.

"Tetetzü drones, cruise missiles aser ballistic missiles tem ajanga oa ali nung item targets raksatsütetba alitsü, ta pai ashi saka Israel-ibo Iran-i amakba takok ngua nokdangtetogo ta tushia jembir.

"Israel-i Iran dak tayang kepzükra ozüi telangzüba agütsüba ya taonung inyakba dang kanga agi tesashiba alitsü,"

ta armed forces chief of staff Major General Mohammad Bagheri-i state TV dang ashi.

Israel-i Iran dak tayang kepzüka nung Washington-i yarira region nung US sepaitem aliba tesem amaktsü ta US dang Switzerland ajanga tekumdangtsü shiogo ta pai ashi.

"Ozü operations temogo aser ano maneni inyaktsü ozü tebilemba mali," ta Bagheri-i ashi aser iba sülen Iran-i Israel military bases ana nung takok ngua amak ta ashi. IRGC commander-ia Israel-i ozü tejangraba, ketdangsur mesüra senso dak makra Tehran-i tayang kepzüksü, ta ashi.

US Tir Joe Biden-i Israel Ato Kilonser Benjamin Netanyahu dang Israel-i Iran dak meyiper amakba nung US-i meyaritsü ta shiogo, ta ashir. Tena phone ajanga jembidang iba osang ya sangoktsü ta ashir. Israel-i meyiper amakba ajak nung US-i anema nokdaksü ta Biden-i Netanyahu dang ashi.

Israel mitkar indang odongtar kati Deobarnü ashiba agi, drones aser missiles 300 dak tema khaloktsü saka shilem 99 anüing nung lia raksatsü.

Iran-i drones 170, cruise missiles 30 dak tema aser ballistic missiles 120 dak tema khaloktsü, ta Rear Adm. Daniel Hagari-i ashi. Ballistic missiles kar Israeli territory atong aser air base ka nung teraksa tera agütsü.

Gaza Strip nung Israel-i Hamas telungpur den ita trok rara aruba mapang Israel aser Iran tsüingta mangatettep adoker lia tang tesisa Iran-i drones aser missiles tem khaloktsü. Hamas aser Islamic Jihad temi October 7 nü arütsü

alema oa Israel nung nisung 1,200 tepseter nisung 250 pua bener aoba sülen rara ya tenzü.

Honibarnü Iran-i Israel amakba indang jembitsü atema UN Security Council ajungben senden ka Deobarnü jazüka liasü. Israel-i tekerba nung iba council ayongzüksü mepishi aser council dang Iran-i amakba aija Revolutionary Guards ya kiralongra telok ka ta sangdongtsü takhangba agütsü.

Iba tatalokba sülen Deobarnü India-i tensa tangsa azüoktsü ayongzü. Israel nung aliba India indang embassy-ia tekumdangtsü sangdong ka agütsüba nung India senso süngjema alitsü ajungshia liasü. "Israel aser Iran tsüingta tensa tamajungba akumba atema süoki ia bilemer, koba ajanga region nung tesunep aser security amokmerener," ta Ministry of External Affairs (MEA) ajanga social media sapang X nung sangdong ka agütsü.

India aser UN dang masü Middle East nung tensa asoshi US Tir Biden-ia jembia liasü.

Iran-i Israel nung anüinglen nungi amakba atema pai aitsü aser telangzüba agütsütsü asoshi osangtsüsang agitepa amalitep akatsü atema Deobarnü G-7 lenirtem senden ka ayongzü.

Britain Ato Kilonser Rishi Sunak-ia Iran aitsü aser Iran-i pei atsüki nung rongrong adokdaksütsü tebilemba lir ta ashi.

European Union, China aser Saudi Arabia linüktemia iba tensa tamajungba akumba atema tebilemstü khuret lemsatepa liasü.



Iran arütsülen aliba Taftan jila nungi osettsüset bener Pakistan-i aodang Balochistan province nung lenmang alema ao aser iba yongji sorkari linük ana tsüingta rail operations anena atatsüsa akum. Iba lendong ya Honibarnü Balochistan nung aliba Tozgi station anasa atalok. "Taftan nungi kilometre 70 shi pilar train ka lenmang alema ao aser ibai kiralongra mapa masü," ta Pakistan Railways odongtar Amir Baloch-i osangbener dang ashi.

# Indonesia kübok Sulawesi

## nung anentsü alu; nisung 15 asü

**Jakarta, Rongchii/April 14 (Agencies):** Central Indonesia nung anentsü tesashi ka aluba sülen nisung 15 süogo aser ana samara bushidar, ta local ketdangsurtemi metetdaksü.

Honibar aonung Sulawesi province kübok Tana Toraja tesem nung anentsüh aluba sülen iba tesem nungi nisung 17 aninogo, ta local disaster agency tekolakba Sulaiman Maila-i Deobarnü ashi.

"Parnok rongnung anabo jembogo, saka tia maka 15 süogo," ta Maila-i AFP news agency dang ashi.

"Iba tesem nung alirtemi ashiba agi, nisung ana tang tashi monguteti lir aser tena ya anentsüh agi nembanger alitsü ta bilemer," ta paisa ashiba den samara alirtem kümzüksü atema inyaktepdar, ta shisem.

Tana Toraja aser iba tesem temeket nung aliba tesemtem nung hopta ka ana tzüinglu kanga sashia arudar, ta pai ashi.

Tzüinglu kanga sashia aruba ajanga aludaktsüba anentsüh yagi iba tesem nung yimtsung ana dak kongshio go aser ki pezü raksatsüogo, ta linük disaster mitigation agency otongdar Abdul Muhari-i ashi.

Anentsüh agi kongshiba tesem tem ya tenem nung lir

aser ibayongji iba tesem tonga aotsü aser tekümzüka maparen inyaktsü kanga tasak lir. Ketdangsurtemi sayaba noksatem nung tekümzükeritemi samara alirtem bushiba aser parnok temeket nung ki chireper aliba nguogo.

Local police tekolakba Gunardi Mundu-i ashiba agi, Hokibar aonung ayaterem matong tsüingda Tana Toraja tesem meket aliba tenem anenzüka alua ki pezü dak kongshi aser iba ajanga yimtsung shilem kabo nembangogo. Paisa, anentsüh aluba mapang ki ka nung kinungertem adenshir liasü.

Indonesia nung tzüinglurowa ya January ita tenzüker aser meteorological agency-i 2024 küm mezüingbuba quarter nung tzüinglu kanga sashia arutsü ta takzütetogo.

Tsüingsang majungba aser lenmang raksar aliba ajanga iba tesem nung tekümzüka maparen inyaktsü tetsükdaksü adoker, ta disaster mitigation agency indang otongdari ashi.

Taoba ita Indonesia kübok Sumatra asetkong nung tzümettsung aser anentsüh lendong nung nisung 26 süogo aser ki aika raksatsüba den nisung meyirejang aika pei talidak ki toktsür aotsüsa kümogo.

# Germany-i Ukraine nem missile tasen agütsütsü

**Kyiv, Rongchii/April 14 (Agencies):** Germany-i Ukraine nem United States nung yangluba Patriot air defence system aser air defence missiles agütsütsü. Russia-i Ukraine indang energy system amakba nokdangtsü atema Kyiv timtema aliba mapang tang Germany-i teyari agütsütsü, ta Ukraine Tir Volodymyr Zelenskyy-i ashi.

Küm ana tejakdang rara tenzüka sülen Russia-i hopta ishika tsüingda tang agi tasembenbuba Ukraine indang power stations aser substations tem anüinglen nungi kanga sashia maka arudar aser iba ajanga Kyiv-i air defences tajungtibatem meshitsüsa kümogo.

"Ukraine nem Patriot system talila ka aser tang aliba air defence systems atema missile agütsütsü asoshi telemtetba agiba atema ni chancellor dang kanga pelar," ta Zelenskyy-i Honibarnü German Chancellor Olaf Scholz den telephone ajanga jembiba sülen ashi.

Germany-i Patriot system ya takaratiba nung agütsütsü, koba taoba mapang agütsür aliba defence systems den

bendenloktsü, ta German defence ministry-i X sabang ajanga metetdaksü.

April 10 nü sangdongba German sorkar sangdong ka nung Ukraine nem agütsüba prangbong injang aser hadirtem rongnung Patriot systems ana bendenloker aliba metetdaksüogo.

Zelenskyy-i taoba hopta ashiba agi, Russia-i amakba nokdangtsü atema US nung yangluba Patriot air defence systems 25 par linüki nüngdaka lir.

2022 küm Ukraine nung rara tenzüka sülen Germany ya US sülen Ukraine nem military teyari agütsürtem rongnung tulutiba kümogo.

Patriots den Berlin-i, armoured fighting vehicles nungi tenzüker artillery amala prangbong injang aser hadir balala Ukraine nem agütsüogo.

Ukraine anütoklen anogo ishika tsüingda tensa kanga mejungi kümogo ta Ukraine indang commander-in-chief, Oleksandr Syrskii-i Honibarnü ashi.

Russia-i, Avdiivka jila anasa yimtsung ka atsüingogo ta ashiba mapang ka nung Oleksandr-i iba osang lemsatepa liasü.

# Carlos Alcaraz Barcelona Open nung masayatsü



**Rongchii/April 14, 2024 (Agencies):** Spain nunger asayar Carlos Alcaraz yiruba ajanga Barcelona Open nung masayatsü atema telemtetba agiogo.

Wimbledon champion aser world number three asayar yagi iba asayamung ya taoba küm ana tashi koker lir, ajisüaka pa teka tachichilen timtem aliba ajanga taküm iba asayamung nung shilem magitetsüsa kümogo.

Arishi küm 20 tain Alcaraz ya kasa timtem ajanga tang asaya aliba Monte Carlo Masters nunga shilem magitet, kong pa Bodhbarnü Canada nunger asayar Felix Auger-Aliassime den asayatsü liasü.

Barcelona Open ya Honibarnü nungi tenzüka qualifying round asaya-a tenzükogo aser iba asayamung nung Rafael Nadal asayaba angutsü.

Alcaraz ya anaben tashi Barcelona Open indang defending champion lir. Pai iba asayamung ya 2022 aser 2023 küm kokogo.

Asayamung ayongertemi social media nung sangdong ka ajanga ashiba agi, "asayar ya Monte Carlo nung asayaba mapang yiru aser Deobarnü training agiba mapang asayatsü asoshi mesademi liasü. Na takaratiba nung taneptsü angutsü aser taruba kümbo asayatetsü imla atar."

Ajisüaka Grand Slam 22 ben tashi koker aliba asayar Nadal-bo Barcelona nung asayatsü atema renema lir. Pa Monte Carlo nungbo masayatsü atema telemtetba agia liasü.

Arishi küm 37 tain asayar ya January ita hip yiruba ajanga taküm Brisbane nung asayaba sülen tang tashi nung asayamung ka nung danga asaya mali. Pa Las Vegas nung dang Alcaraz den exhibition asaya ka nung asayar lir.

Nadal iba asayamung nung Hombarnü Italy nunger asayar Flavio Cobolli den asayatsü. Pa iba asayamung 13buba akoktsü timla nung asayadar.

# Monte Carlo Masters: Ruud aser Tsitsipas na Final asayatsü



Ruud



Stefanos Tsitsipas

**Rongchii/April 14, 2024 (Agencies):** Honibarnü Monte Carlo Masters tebur kija asaya semifinal nung Casper Ruud-i Novak Djokovic kokogo.

Semifinal asaya nung Ruud-i 6-4, 1-6, 6-4 agi Serbia nunger world number one asayar ya kokogo aser pa final Stefanos Tsitsipas den asayatsü.

Tanga semifinal ka nung Tsitsipas-i 6-4, 3-6, 6-4 agi Jannik Sinner kokogo. Iba asaya makokba densema Australian Open champion Sinner taküm tang agi tanabenbuba tamakok nguogo.

Djokovic aser Ruud na tang agi trokbenbuba asayaogo aser Ruud-i tang mezüngbuba asaya ka kokogo. Pai taoba mapang Djokovic den asayaba mapang

set ka danga koker maliasü, kong taoba küm French Open final nung tamakok anguba densema lir.

Tena tsüngda deciding set asayaba mapang Djokovic 4-1 agi tesülen liasü saka pai pa indang taruba serve break mesüdaktsüba den Ruud indang serve ka break süa 4-3 aküm.

Game 10buba nung Djokovic-i serve aoba mapang pa love-40 agi tesülen liasü aser Ruud-i pa indang match point tasembuba nung asaya koka liasü.

Ruud aser Tsitsipas naprongla taküm mezüngbuba asayamung akoktsü atema asayadar.

Grand Slam 24 tashi koker aliba asayar Djokovic-i taküm

asayamung ka danga koka mali. Pai tang tashi nung ajak senteper asayamung 98 koka lir.

Sinner shibai 2024 küm asayamung asem tashi koker lir, pai deciding set amokbanger asaya-a pa service game ka teka nung lia 4-3 agi tejakdang liasü.

Iba sülen pai medical timeout ka meshi aser asaya tenzükshiba sülen Tsitsipas-i pa indang serve break süa point kasasa aküm.

Asaya nung Sinner hamstring nung timtem adokba ajanga aloka aloka asaya liasü. Pai takokba tashi kanga meranga asayadang ajisüaka pa arakzüa asayatsü asoshi mesademi akümba sülen Tsitsipas nem asaya kokdakja liasü.

# Asian Wrestling Championships: Anju & Harshita na final-i iogo

**Rongchii/April 14, 2024 (Agencies):** Railways wrestler Anju, shibai tawa selection trials nung Vinesh Phogat tükdaksü, la aser Harshita nati Deobarnü Asian Championships nung pei tata category nung kanga junga asaya gold medal bouts tongtetogo.

Ajisüaka Sarita Mor bo mimlai Deobarnü mezüngbuba round nung tsukatokogo.

Kang dang toktepa asayaba 53kg weight class category nung Anju-i Philippines tsür Aliah Rose Gavalez aser Sri Lanka tsür Nethmi Ahinsa Fernando na amokbanger asaya-a technical superiority agi koka liasü.

Semifinal nung China tsür Chun Lei-i Anju nem timtem agütsü, ajisüaka lai iba asaya-a 9-6 agi koka liasü.

Final nung Anju Korea tsür Ji Hyang Kim den asayatsü. Kasa mapang nung

Harshita-i final tonga asayaba mapang point asem dang agüja liasü. Lai Uzbekistan tsür Ozoda Zaripboeva technical superiority (13-3) agi akok aser iba sülen Kazakhstan tsür Anastassiya Panassovich 5-0 agi koka liasü.

La final nung China tsür Qian Jiang den asayatsü.

Ajisüaka mimlai lia India team nungi World Championship medallist Sarita quarterfinal nung Mongolia tsür Gantuya Enkhbat-i 4-8 agi kokogo.

Arishi küm 28 tain asayar ya iba category nung medal angutsü imlartem rongnung ka liasü. Iba sülen Enkhbat semifinal nung tamakok anguba ajanga Sarita medal atema asayatsü asoshi maongka monguteti liasü.

Maneni India team nungi Manisha Bhanwala (62kg) aser Antim Kundu (65kg) na bronze medal atema asayatsü.

# McGregor UFC 303 nung Chandler den asayatsü



**Rongchii/April 14, 2024 (Agencies):** Küm asem tejakdang Dustin Poirier den asayaba mapang tetsüng sükdangba ajanga masayai lir Conor McGregor June 29 nü Michael Chandler den asayatsü, ta Ultimate Fighting Championship (UFC) Tir Dana White-i metetdaksüogo.

Iba welterweight bout ya Las Vegas nung UFC 303 card indang headline asütsü, ta White-i Honibarnü UFC 300 asayaba sülen osangbenertem dang ashi.

McGregor-ia kasa osang ya taoba küm December ita X sabang ajanga metetdaksür liasü. Pai kasa anogo aser kasa opponent indang osang sangdong aser ashiba agi, iba asaya ya asayar ka tanaben meyipa arur asayaba asaya tulutiba asütsü.

Ireland nunger asayar

McGregor (22-6) ya 2021 küm July ita Poirier TKO agi makokba asaya nung tetsüng sükdangba sülen tang tashi khen danga asaya mali.

Tetsüng sükdangba sülen tapoba mapang UFC featherweight aser lightweight champion ya surgery agitsüsa aküm.

Kasa mapang nung taoba Bellator lightweight champion Chandler-a (23-8) 2022 küm November ita tatembangbuba asayaba mapang külem America nunger asayar Poirier-i tsükdaksür lir.

McGregor aser Chandler na asayatsüba osang ya UFC-i küm ka dak tema agüja arudar.

Maneni McGregor aser Chandler na ya taoba küm MMA dak ajemdaker yangluba reality show 'The Ultimate Fighter' nung team balala indang coach liasü.

## BILEMDANGANG

"Tangar tangatetba nem nü tangatetba tazüokdaksü."